

書錄彙編

經筵講官太子太傅協辦大學士管理禮部
事務
實錄館總裁
上書房總師傅
紫禁
城騎馬
贈太師大學士入祀賢良祠諡文正

皇朝書目

傳 584.524
284

Inches
Centimetres
1 2 3 4 5 6 7 8 9 10 11 12
1 2 3 4 5 6 7 8 9 10 11 12

0 10 20 30 40 50 60 70 80 90 100 110 120 130 140 150 160

年譜

府君系出濱州杜氏諱受田字芝農乾隆五十二年
丁未九月初三日亥時生以同曾祖兄弟序居三時
先曾祖考妣皆在堂府君生而岐嶷面赤如丹砂見
者以爲異徵

戊申二歲

己酉三歲識字輒記不忘是年家祖與選拔貢生

庚戌四歲家祖應

函 1 冊 各 冊 59032

杜芝農年譜

東巡召試一等一名

賜舉人

辛亥五歲先曾祖贈光祿公卒

壬子六歲

癸丑七歲入小學先曾祖妣李太夫人卒謹按家祖
石畫龕筆記府君幼時與羣兒異不好嬉戲而和諧
無爭亦無忤也遇有爭忤則一言解之所見出羣兒
上羣覺其異共樂附之初學文卽近場屋體裁識者

知爲發科決策人也

甲寅八歲

乙卯九歲

嘉慶元年丙辰十歲

丁巳十一歲

戊午十二歲

己未十三歲

庚申十四歲家祖授徒蒲台蓋氏府君隨侍

辛酉十五歲家祖成進士改庶吉士

壬戌十六歲家祖散館授職編修府君侍祖妣李夫人來京師卜居沙土園謹按石畫龕筆記府君幼時家祖教以作文詩法輒能領受家祖以是樂而忘貧匱之患迨隨宦京師翰林清寂貧乏艱難益甚而府君學益進嶄然頭角過儕輩家祖尤樂教之朝夕不倦若不知寒之在體饑之在腹者

癸亥十七歲府君旋里應童子試補州學生督學萍

鄉劉金門先生鳳誥試列府君第一其第二則叔祖

季封公第三則堂伯右圃公也

甲子十八歲科試一等食餼

乙丑十九歲吾母張夫人來歸

丙寅二十歲 不孝翰生

丁卯二十一歲

戊辰二十二歲時寓居宣武門外之香爐營屋廬朽敝欹側將虞傾壓夏月大雨連旬夜聞屋壁有聲則

數起坐七月歸應山東鄉試途中遇積潦草筏而渡者恒數十里是年 不孝翻 生

己巳二十三歲

庚午二十四歲中山東本省鄉試第四十四名舉人座師太常寺卿後官通政使臨桂張南崧先生鵬展編修後官山東鹽運使南海李石泉先生可瓊房師臨邑縣知縣新會譚德民先生彝謹按石畫龕筆記府君隨宦京寓七八年中家祖自治館書而外無他

事惟與討論文章及古今事蹟風雨之晨冰霜之夕孤鐙熒然家祖弗爲勸府君受益尤多伯祖樗園公寓書家祖甚喜蓋樗園公晚而始遇尤喜府君領解之早云

辛未二十五歲考取景山官學教習

壬申二十六歲伯祖樗園公卒於濟南以 不孝翰 承

嗣家祖命府君星馳回里經理喪事

癸酉二十七歲

甲戌二十八歲是年家祖病傷寒數瀕危府君侍湯藥衣不解帶者數月四月適李女生

乙亥二十九歲府君教習期滿引

見以知縣用六月家祖放順天學政移居老牆根家祖每出按試府君隨行動經數月祖妣李夫人體素羸弱府君既鮮兄弟尤依戀不忍去而勢難兼顧時堂伯右圃公肄業來京師府君執手懇託代爲侍奉每至泣下

丙子三十歲隨侍家祖學政任

丁丑三十一歲隨侍學政任

戊寅三十二歲隨侍學政任

己卯二十三歲家祖學政任滿

庚辰二十四歲十月祖妣李夫人卒府君哀毀骨立又慮家祖愴悼重傷親心勉強節哀事事盡禮及百日離苦次卽晝夜侍家祖側刻弗稍離謹按石畫龕筆記云余惟一室書史自娛有所得書於冊而示之

幸其能解余意故常以是爲樂

道光元年辛巳三十五歲家祖督學浙江府君隨侍
十二月出都

壬午三十六歲隨侍浙江學政任八月由浙旋里爲
先祖妣李夫人營葬事事稟承伯祖次屏公兆域成
九月入京十月奉李夫人柩歸里安葬十一月復旋
京寓宣武門外之英濟堂是冬翰翻隨張夫人奉翰

嗣祖母李夫人伯祖次屏公赴浙

癸未三十七歲正月服除會試中式第一名進士座
主爲大學士欽曹文正公振鏞禮部尙書後官協辦
大學士山陽汪文端公廷珍吏部左侍郎後官工部
尙書高郵王文簡公引之戶部左侍郎後官大學士
滿洲穆鶴舫先生彰阿房師翰林院編修後官御史
天津韓鶴莊先生大信 殿試二甲第一名 朝考
入選第五名改庶吉士報至浙家祖按試湖州甫下
車時考棚落成太守請書堂額乃題曰聞喜堂八月

府君請假省親出都九月抵杭州

甲申三十八歲隨侍浙江學政任

乙酉三十九歲隨侍家祖學政任滿九月偕張夫人

奉翰嗣祖母李夫人旋京留翰侍家祖候代十一

月始旋京卜居於宣武門外之八寶店府君隨任經

理庶務服勞無間在順天及浙江皆然浙江地濱江

海暑溼特甚府君向患肝氣每值寒暑飢勞輒觸發

是年七月在杭州發尤劇月餘始痊

丙戌四十歲散館授職編修八月移居內城太平街

是年正月為翰授室張氏海豐孝廉方正後中辛卯

科副榜官中城兵馬司指揮名求公女即張夫人姪

女八月為翻授室史氏樂陵乙丑科翰林官兵部左

侍郎名譜公女十月翰考廕生引

見內用

丁亥四十一歲充 國史館協修府君官詞垣清簡

自攝惟事親課子家政必親綜覈洎兼史館以每月

朔望及三六九日赴館期重加親朋慶弔酬應頗繁
而定省溫清出告反面未嘗少間時同官詞垣者多
為會課府君以公趨之暇侍家祖左右不欲更以他
事離側故來約會課者必婉謝之而每歲秋冬夜於
鐙下自課詩賦自丙戌至辛卯得瀛洲賦草百餘首
試帖詩草二百餘首

戊子四十二歲秋充順天鄉試同考官得士曾廣淵
等二十二人副榜丁暹等五人是年遣翻歸里應童

子試誠諭諄諄凡考試規矩交友接物之道訓示尤

詳翻入州學

己丑四十三歲補 國史館纂修尋充總纂

庚寅四十四歲充 國史館提調每館期辰往西還

風雨寒暑無間有滿館供事某因館中考取謄錄舞
弊事覺總裁德州盧文肅公盛怒責府君偕提調清
苑王曉林先生植嚴切查辦滿提調頗懼懼重咎同
館亦皆危之府君廉得其實僅斥革供事而滿提調

以失察記過時論僉服不苛

辛卯四十五歲充鄉試磨勘官是年

宣宗御製詩初集刊成掌院學士派翰林八人恭繕袖珍一部進呈府君與焉蒙

恩賞江綢二端

壬辰四十六歲充雲南鄉試副考官五月出都行次河南裕州而正考官沔陽陸笠夫先生建瀛聞訃府君獨行八月朔抵雲南補正考官爲常熟費佩青先

生開綬遲四日至得士蕭文蔚等五十四人副榜唐

弼等十八人十二月旋京長途萬里柳往雪來得詩若

千首又著滇使紀程一卷翻舉於鄉

癸巳四十七歲二月家十一叔十二叔十三叔來京

省視家祖卽留讀書府君友愛尤篤殷殷獎進如不

及後十一叔受履甲辰乙巳鄉會聯捷成進士十二

叔受慶入庠食餼十三叔受廉與丁酉科選拔貢生

七月大考翰詹題落葉賦馬援討交阯論研經軌道

詩府君列二等第二名升中允先換頂帶八月奉督
學陝甘之

命以

翻

外舅史荔園先生譜任陝西巡撫奏請迴避調山西

學政九月出京命

翻

隨任而張夫人留京侍家祖甘

旨履任後卽按試平陽蒲州二府絳霍隰解四州歲
除回省時有家祖同年丁公公璐爲山西某縣令卒
於官旅櫬淹留久不得歸府君亟厚助之俾歸骨焉
甲午四十八歲補右春坊右中允尋轉左中允正月

出省按試汾澤潞沁三府一州五月回省試太原當

試潞安時以積勞觸肝氣舊症府君力疾治公不輟

比及回省始獲就痊七月遣

翻

回京省視家祖九月

翰

赴山西隨侍十月適李女出嫁婿名星緯利津縣

廩膳生先祖妣姪孫也

乙未四十九歲正月出省按試平陽蒲絳霍解等府
州趙城逆匪曹順反戕官據城時府君方試平陽平
陽距趙城五十里耳士子雲集聞亂騷然慮且有變

或請暫輟試事府君聲色不動局試晏然郡人賴以
安定五月回省遣翰入京應順天鄉試七月府君升
洗馬奉

召回京供職府君兩奉使節未嘗色喜惟念家祖年高弗願
暫離左右依戀之情時見顏色當提調史館卽慮京
察外簡泊視學晉省未及一年輒冀內召故聞是

命候新任至卽日交卸起程八月杪抵京府君兩隨家祖學
政之任於衡文防弊興文教正士習旣洞悉之又爲

諸生日嘗受知於黃梅帥僊洲先生承瀛帥督學東
省弊絕風清士論翕服府君尤服膺焉至是衡校之
事一倣其成法或師其意因時地而斟酌之每按試
蒞一郡先期示諭嚴禁槍冒懷夾等弊考試經古及
覆試小場搜檢加嚴正場轉少犯者其有代倩及鈔
錄夾帶者皆於卷中詳辨之故終無倖售者嘗諭翰
等曰士子讀書須養其羞惡之心犯法而懲之至荷
校示辱何如先操其原使不犯法學政之於士子師

生也場規肅靜一如學規有亂號接談犯規者立提
置堂號仍令作文完場交卷時發落就所犯輕重分
別戒飭之所以培養士氣類此晉有數邑俗稱好訟
多以細微嫌怨或捏詞砌語具控往往控亦不復求
理府君按臨放告日坐大堂親收呈詞當卽提訊盤
詰數語輒卽詞窮於是擲還呈詞反覆開示使釋然
於心至再按臨其地則來控者鮮矣所識拔多真材
比年登春秋榜者不絕甲午貢優行者四人蔚光霞

黃汝梅白恩佑張方泳皆先後成進士爲前此所罕

見去任之日士人攀戀公上人倫師表額却之不獲

是年家祖調禮部左侍郎翰舉順天鄉試翻成進士

改庶吉士報至晉府君適行節次聞喜縣與家祖在

浙題聞喜堂額先後符映時稱佳話

丙申五十歲正月奉

硃諭四阿哥著於四月初三日入學讀書杜受田著充四阿

哥師傅欽此四月充日講起居注官入上書房移居

定園廬於澄懷園中之古藤陽每日卯入申出無間

寒暑

宣宗召對面諭以書房爲根本之地非祇誦詩讀書肄習文藝務使皇子深明理道變化氣質所以充此任者必求端人正士今以皇子付汝以後朕悉不與聞至向來書房習氣不可不除應卽如尋常學塾教讀之法俾諸皇子敬愛兼至庶一日之間與正人居處多一時卽與宦寺居處少一時府君祇承

聖諭遵奉惟謹每於書房講論經史必思融貫古今旁通曲證不徒誦習章句而已於一言一動必親切糾繩以至飲食寒暑無不加意調護後蒙

召對

宣宗自喜簡用得人是年正月家祖致仕四月^翻散館授職

編修府君以^翻在庶常習國書詩賦無專功命居園

寓時督課之端節蒙 賜藥錠香囊蕉箑扇葛紗

屯絹年節 賜福壽字綢緞貂皮荷包福方絹箋湖

全言
穎麇鹿及歲時入貢方物棧斤香茗果餅魚鮮歛硯
徽墨之屬時蒙 頒賜每歲與焉

丁酉五十一歲 京察一等升右庶子九月偶患瘍
疾請假調理

命傳旨給假不必明降諭旨蓋不欲

今上知有疾致念慮也十二月升侍講學士每歲園直及
冬隨入城是冬府君僦居於西安門內之靜默寺中
便入直也間三五日歸省自是歲以爲常

戊戌五十二歲四月轉侍讀學士蒙 賞貂皮

特諭毋庸繳價適^翰等表兄弟海豐張衍重樂陵王榮第同

以選拔貢生來試 朝考府君招之園寓直餘親爲
指授文藝後辛丑乙巳先後成進士入詞林從堂兄
翊時亦以廩貢生來肄業成均從兄幼失怙恃府君
撫之不異^翰等飲食教誨愛勞兼至七月升內閣學
士

命專心授讀勿庸到閣批本十二月升工部左侍郎

年譜
己亥五十三歲八月兼署工部錢法堂事務

庚子五十四歲正月翰嗣祖母李夫人卒於里先是

李夫人疾命翰星馳歸省及訃音至即日命翰婦張

氏歸並傳諭翰俟安葬後來京四月充朝考閱卷

官翻充會試同考官

辛丑五十五歲充會試副總裁取中宗室錫齡等二人蔡念慈等二百人閏三月調戶部左侍郎兼管三庫事務時以庫丁盜銀事覺整頓庫務汰管庫大臣

二員以戶部左侍郎兼轄府君任事間五日輪班赴庫監視收發酷暑嚴寒必坐簷厦竟日茶食悉自攜帶嚴誠跟役不得一與丁胥交接向來管庫大臣月有飯銀五十兩至是奏明歸公府君益以潔己奉公為司屬倡四月孫庭琛生

壬寅五十六歲比年海疆不靖見廣東生員某所著海防書內有木簾火攻一條府君錄奏請行又以籌議經費有給事中某奏陳請推廣捐例准增附生報

捐復設訓導一疏下廷臣議府君奏言臣查復設訓

導與教授學正教諭階級雖殊其爲士子之師則一
歷屆事例止准廩生報捐原以廩生食餼歲久例准
考充歲貢卽循資可選教職是於權宜變通之中仍
寓慎重師儒之意至增生附生年深者止准給予衣
頂出學並無入仕之途與廩生原有區別學臣歲科
兩試大率一學之中文理最優者擢居前列次則多
屬中平其三等則荒疎譎陋者均廁名其間若一概

准其捐納教職則是文理中平甚至荒疎譎陋者苟
力能援例皆得抗顏爲師恐墮士子讀書向上之心
卽學臣試士考居優等者凡屬寒畯終爲生徒考居
下等者但有資財便爲師長學問文章皆可不論考
課懲勸將無所施於 國家造就人才敦勵學行之
道實有妨碍竊以爲該給事中此奏所益者微所損
者大未便准行疏入留中十二月充 經筵講官是
年翻升右春坊右贊善越日調國子監司業

年譜
癸卯五十七歲二月充大考翰詹閱卷大臣 國史館接纂一統志全書告成在館歷充纂辦各員分別議敘府君與焉

甲辰五十八歲二月升都察院左都御史管理戶部三庫事務派 經筵直講四月派閱庶吉士散館卷八月充順天鄉試正考官取中宗室舒璐等五人劉國彥等二百十九人副榜劉祝慶等四十三人十一月 賜紫禁城騎馬十二月升工部尙書是年翰成

進士改庶吉士翻升司經局洗馬擢翰林院侍講

乙巳五十九歲二月派承修

東陵工程恭遇

皇太后六旬萬壽覃恩以本身封典 馳封九叔祖介菴公先是舅祖李雲屏公壽春官山西沁源令罷職歸卒家徒壁立又以欠交官項追呼乃鬻先世祭田完繳府君聞之愀然以五百金爲贖復之除夕宴 太和殿觀四裔樂上元宴 正大光明殿 賜蟒袍玉碗

諸物及 坤寧宮 賜餽祭神肉每歲與焉是年

翰

散館授職檢討

丙午六十歲九月生辰蒙

御書福壽字壽佛朝珠如意蟒袍料江綢春綢帽緯之

賜遣武備院卿存佑賚送到寓

今上於潛邸遣內監頒畫二軸如意一柄江綢四端食物

八盒 惇邸 恭邸各餽珍繡駢蕃九月派閱順天

鄉試覆試卷是年翻京察一等記名以道府用升右

庶子

丁未六十一歲正月

命軍機大臣查一二品大員有老親年屆八旬以上者悉列

以聞家祖時年八十有四蒙

恩賜御書教忠篤慶扁額福壽字各一如意一柄文綺四端

三月充會試副總裁取中宗室載鏗等二人許彭壽

等二百二十一人充 朝考閱卷官是年翻升侍講

學士孫庭珪生

年譜
戊申六十二歲孫庭璆生

己酉六十三歲派管理河道溝渠二月充 上書房

總師傅九月派閱順天鄉試覆試卷是年家祖重宴

鹿鳴

賞頭品頂帶加太子太保銜

翰

授湖北學政

翻

升詹事府少

詹事擢詹事充江南鄉試副考官

庚戌六十四歲正月

宣宗成皇帝龍馭上賓府君於西安門外假陳文愨公官俊

寓齋宿每日哭臨三次盡慟極哀二月

梓宮奉移淀園府君恭送步行出西直門蒙 賜

先帝遺念紅絨結頂皮冠一頂四開襖袍一件荷包一對水

晶煙壺一箇時會議

宣宗升祔事府君以爲

先帝功德克迪

前光雖

遺旨自存搗抑爲臣子者斷不敢奉

詔廷臣頗有持異議者弗與爲辯惟於

召對時多所敷陳未嘗以泄於人卽^翰等亦莫由知也尋

奉

上諭朕自八歲入學讀書仰蒙

皇考特諭杜受田爲朕講習討論十餘年來啟迪多方恪勤

罔懈受益良多允宜特沛殊恩以崇碩學杜受田著賞

加太子太傅銜伊父前任禮部侍郎杜墀年踰八旬精

神彊固貽謀遠大濟美中朝前經

皇考賞給教忠篤慶扁額並頭品頂帶太子太保銜朕今復

親書扁額頒給以示篤念耆臣推恩錫類至意欽此尋

奉

御書達尊錫類扁額交造辦處裝池

命內監賚至翰林花園交府君祇領二月充

實錄館總裁三月兼署吏部尙書派覆勘會試試卷四月充

殿試讀卷官五月派教習庶吉士調刑部尙書六

月授協辦大學士八月奉

命專司勘辦

實錄稿本九月

宣宗梓宮奉移

慕陵派恭送並隨扈尋以奉移禮成府君以前任工部尙書

詔加二級

上諭

實錄館纂辦稿本漸次成書杜受田專司勘辦毋庸赴刑部
辦事欽此時以黃河淤高受病日深請及時疏濬畧言

近年黃河入海之處塌陷至數百丈應乘冬令水小
就其塌陷處所多築草壩逼溜攻刷可期事半功倍
請相度形勢及早興工疏入下兩河查照辦理會有
旨命廷臣各舉所知府君疏薦前總督林則徐周天爵工
部郎中汪潤咸維禮戶部主事蔡賡颺五人府君湖
自丙申歲侍

今上於書房歲節生辰蒙 賚書畫聯幅摺扇若干件歷
年弄藏至是恭繳進奉

旨著仍賞給府君自調任刑部念刑名之事素所未悉奏
謝日嘗面陳之

上諭留心學習久自諳悉府君益矢慎重每定一讞弗厭
詳求至於再三務期明允署中每十日以獄囚及羈
獄候讞者開單呈堂如爲數加多輒爲愀然不懌者
累日時薛執中一案牽涉大員多人

上以其文字狂悖震怒朝列羣相疑駭獨府君夷然視之
謂此盛世莠民愚妄無知不足以悖逆置重典也值

召對從容陳之恭遇 覃恩以本身應得封典賜封八叔

祖春岩公自上年十二月

孝和睿皇后大喪本年正月

宣宗升遐凡

梓宮漆飾奉移皆工部祇辦府君肅恭將事始終惟謹二月

監視漆飾因感冒觸發肝氣請假調理

上遣內閣學士肅順看視次日具摺謝府君每發肝氣覺
少腹左有積塊上衝至胃口橫衝左脅作痛坐臥難

安飲食爲之不進必推按移時則積塊復其原處痛
止氣舒此次感寒觸發復添寒熱往來如瘧而積塊
推下旋起更益頻數是年翻升內閣學士翰婦攜孫
庭珏赴湖北任

咸豐元年辛亥六十五歲正月

賜御書平安二字一幅又頒

宣宗御製詩文餘集

上謁

慕陵几筵前行週年禮

命留京辦事尋奉

諭朕在書房經協辦大學士杜受田昕夕講求詩文積有
稿本其中可存之作卽交杜受田重爲校勘編次進呈
俟閱定後再行發交繕刻欽此四月

命盤查三庫派閱考試試差卷五月復以肝疾請假調理
越數日

上遣侍衛托雲保看視垂詢醫藥甚詳並問期滿能否銷

假時府君病良已次日銷假並具謝奉

上諭刑部事務較繁杜受田現在專司勘辦

實錄稿本職任綦重雖從前已諭令毋庸赴部辦事惟緊要

案件例須同堂面商定讞究難兼顧杜受田著加恩以
協辦大學士管理禮部事務俾得專勘稿本益昭敬慎
欽此

賜御門聽政詩石刻充順天鄉試正考官取中宗室瑞聯
等五人王題雁等三百六人副榜馮慶熙等四十三

人府君自上年奉

命專司勘辦

實錄稿本乃假東安門外錫蠟胡同陸氏別墅居之屋十餘

楹僅足容郝每辰詣館至酉始出敬謹校勘其有敘
次遺漏載列失序及句讀訛錯字畫舛誤者皆悉心
釐正禮部每奉交議之件事涉更張有關禮制者尤
平心酌核手自定稿如議復祭酒勝公保條奏丁祭
禮儀請復舊制又直隸京官與考試生貢互稟籍貫

不清下禮部議定入籍章程又議復兩江總督陸公
建瀛奏請令學政按試添試性理論各疏均奉

旨允行時山東被水成災府君捐銀備賑得

旨從優議敘是年翻署工部左侍郎升兵部右侍郎

二年壬子六十六歲二月京察屆期奉

硃諭協辦大學士杜受田學醇品正在上書房行走多年
深資訓誨現承辦

實錄底本詳慎纂輯不遺餘力著加恩交部議敘欽此又蒙

賜御書八分體大壽字一幅

宣宗梓宮奉安

慕陵派隨扈恭送

神牌黃輿還京

詔加二級三月

上謁

慕陵行釋服禮

命留京辦事翻充會試副總裁恭遇 覃恩贈封三代如

例並請本身應得封典派覆勘會試試卷閱考試試
差卷充 殿試讀卷官奉

命偕新授福州將軍怡公良前往山東江南查辦事件奏
言自去歲豐北決口山東江蘇被淹賑恤不可稍緩
辦理尤須得人藩司爲錢糧總匯而州縣官皆其所
屬賢能不肖皆所素知山東藩司劉源灝居心公正
幹練有爲江甯藩司祁宿藻實心任事誠樸廉明請
旨飭令二員督辦必能實惠及民又被水地方甚寬待賑

人數尤衆請截留江廣幫漕六十萬石分撥山東江
蘇各三十萬石其水陸如何撥運州縣如何囤積村
莊如何散給即可令其迅定章程飭委妥辦得

旨允行五月出都行抵濟甯奏言災區雖有重輕賑務務
期周備臣等於行入東境細詢經過州縣並於抵濟
甯後密加訪查與藩司劉源灝面稱之魚臺金鄉嘉
祥滕嶧濟甯六州縣被淹成災情形大畧相同又接
據兩江總督陸建瀛咨稱江廣各幫均已北來浙省

全言
幫船尙未行入蘇境應卽在最後之浙幫截撥或易
銀移解等語伏思江廣各幫先能挽入東境則仍遵
前

旨令其先行起卸以資散放無庸過爲拘泥俾免貽誤又
藩司劉源灝聲稱伏秋大汛下游未經疏暢各處秋
收豐歉勢難預定設將來再有偏災則將來之情形
與上年互有同異而災口實數此時亦難預定應俟
秋後確查被災輕重分別辦理倘賑至冬底猶有不
敷卽於附近州縣酌動倉穀協濟所見尙爲合宜應
如所擬辦理至截漕濟賑誠恐旗丁等旣知作爲賑
米攙水和土勢所必至請

飭下漕運總督於交米時會同受米之員認真盤驗如有
短少潮溼不堪食用者卽將丁舵人等嚴懲究辦仍
令賠繳以重賑務而杜弊端據藩司定擬章程十條
鈔錄具奏奉

上諭杜受田怡良奏遵查山東賑務先籌辦理情形並將

劉源灝酌擬章程十條開單呈覽一摺據稱上年豐北漫口山東瀕河一帶州縣被淹成災魚臺最重濟甯次之金鄉嘉祥滕嶧又次之曾經分別輕重三次放賑現在河運各幫有能挽入東境者卽令先行起卸以資散放等語著卽責成該省藩司劉源灝於散賑時妥爲辦理惟伏秋大汛水勢大小及秋收豐歉勢難預定情形與上年不無異同著杜受田怡良咨明山東巡撫飭令該藩司於秋後確查被災輕重分別奏明辦理至截漕

備賑各幫船昨已降旨諭令陸建瀛等於業經渡黃船隻嚴催前進惟旗丁人等旣知漕糧作爲賑米恐沿途攙水和土藉滋弊端著楊殿邦督飭該管糧道認真盤查如交米時有短少潮溼等弊卽將丁舵人等嚴懲究辦仍責令賠補以重賑務另單奏酌定期預籌撥運及遴委大員監盤分運並分撥賑米存卸災區撥運腳費作正開銷預查戶口分設米廠各事宜俱著照所議辦理仍責成該藩司隨時體察情形斟酌妥辦欽此抵

清江浦奏言^臣等行抵清江浦因豐沛銅碭被災較重飭委隨帶司員馳赴徐州一帶密加查勘並接見江甯藩司祁宿藻據稱徐州被災沛縣較重其次則豐縣銅山縣再其次則碭山縣皆係口門左右地面先經捐廉賑濟邳州宿遷被災較輕亦分別撫卹並修隄以工代賑桃源清河安東沭陽海州本屬下游勘不成災民情安帖旋據司員由徐州馳回與藩司所稱大畧相同查豐沛銅碭四縣除當時捐辦急撫外自上年十月至今春三月連放賑六次邳州放賑三次宿遷放賑一次復於子房山挑通河道以工代賑豐沛一帶棚棲河堤災民酌給錢文分別資遣其老弱無依者由該廳官施粥以資糊口宿遷以下各州縣業經請緩本年上忙錢糧以紓民力茲復蒙恩截漕賑濟官吏士民無不同深感戴惟汎水消長勢難預定既不能定秋收之豐歉亦不能定災分之重輕且挨查戶口必須另給賑票所有此次放賑米石擬

請沛縣撥米九萬石豐縣撥米七萬五千石銅山縣撥米五萬石碭山縣撥米二萬三千石邳州撥米三萬石均自九月初旬開放其迤下之宿遷桃源沐陽安東清河海州等州縣應將餘米三萬二千石酌量分撥各數千石俟秋汛後查勘情形酌量撫卹並將藩司酌定章程鈔錄具奏

硃批該藩司所擬章程甚屬周妥卿等督辦賑務未能深悉地方情形務須責成該藩司盡心籌畫著傳諭祁宿

藻知之欽此府君之奉使也出都之日冒暑過行

翻輒

心動夜夢數數驚悸時從兄翊謁選在都乃請潛行隨從偵探途次起居眠食時以寄聞知府君行次濟甯患泄數日卽痊觸暑南行又以積潦載途舍陸而舟舟小暑蒸殆不可堪六月十七日抵清江浦復以溽暑觸發肝氣醫者言肝木剋脾土中氣已虛若投表散之劑則中氣不任投補益之劑則外感未清於是酌用清解之劑十餘迄不得效飲食日減氣分愈

全譜
三
虧府君猶力疾治公日以賑務咨訪籌畫手定奏稿
迨七月初八日拜發奏摺至初九日晨起猶衣冠對
客乃午後精神漸散氣息寢微醫藥遂不能進延至
酉刻遽薨嗚呼痛哉當病革時府君自度不起亟延
隨帶司員至榻前口授遺疏畧言臣奉

命查辦山東江南事件於具奏山東賑務情形後馳赴江
南冒暑過征感受暑溼觸動舊患肝症趕緊延醫調
治覺精神尚可支持仍照常辦公於七月初八日復

將江南賑務情形恭摺具奏詎料病勢日增醫藥罔
效神散氣浮自揣萬無生理伏念臣山左樁材遭逢

聖世荷蒙

宣宗成皇帝特達之知由翰林入直

上書房洊歷卿貳復蒙我

皇上非常寵眷俾贊

綸扉臣父杜塢晉銜賜額備受

殊施臣子杜翰杜翻均荷

天恩置身清貴自愧庸愚渥膺

高厚

寵榮至極報稱毫無方思勉策駑駘長依

雲日不意遽染沈疴身先溘露迴瞻

廷闕感戀涕零上不能盡忠補過仰荅

君恩下不能退食承歡長娛親志言念及此痛裂肝腸惟

念楚氛未靖河患未平度支未裕數者均關艱鉅伏

願我

皇上敬

天法

祖勤政愛民本兢業以

敕幾慎好惡以出治崇節儉以勵俗平賞罰以

協中

聖德彌新

治功益懋則我

國家長治久安胥基於此臣雖在九原實有榮幸臣志

督神昏語盡音竭無任依戀銜結之至先是翰赴湖

北學政之任出都日張夫人命購佳木寄京比至鄂
得陰沈一具適以湖南長沙令易君學超奉差入都
行過武昌府君戊子分校所得士也遂託之攜帶乃
易君因案中途折回又數月始北上及是抵清江初
九日辰刻來謁府君猶諄諄囑令到京勿以病狀白
家祖也比府君薨清江向乏佳木易君乃以此達河
帥初十日酉刻遂以大殮顏色不變體柔如生室中

異香累日猶在云府君疾革從兄翊實在側料理醫

藥飲食及身後衣衾含殮附身附棺悉遵家禮弗敢
隕越府君自官詞林時家祖為吏部侍郎每值

召對輒垂詢及府君仰蒙

先帝知遇有人品端方之褒入直之初又蒙

垂訓有古人溫樹不言之諭

今上御極府君以潛邸舊學時承顧問益自謹愆故於家
庭讌語從不及禁中事平日獻替翰等益弗得聞而

年姻故舊頗有以無所建白爲言者領之而已府君性純孝自先祖妣棄養每值忌辰哀愴竟日兩隨家祖學政任事無鉅細先意預籌終其任家祖未嘗覺勞入直書房以後每於散直或早及入署之期得歸省侍膳必諭^翰等潔製滑甘手自進食家祖飯有加則喜形於色實終身孺子慕也奉使行瀕登輿惟顧張夫人曰盡心堂上兩餐彌留時執從兄^翊手曰吾父年八十九矣語不及他嗚呼痛哉平生所學一以

主敬爲宗先祖嘗言府君侍親側時愈久則容益肅至於應事接物肫然藹然真有無衆寡無小大無敢慢者與人坦白無城府所與共事從無小忤故人皆樂附焉然內實嚴毅非義之干莫敢至前親朋饋遺卽一介必衷諸義道自奉儉約而樂施與親知婚嫁喪葬有以貧乏告者無不竭力俛助未嘗以生計自謀服官三十年無一畝之植一椽之覆也治官事尤勤懇出都前一日猶赴館竟日蓋以

實錄稿本惟府君一手勘辦成之至是始告竣矣自丙申入

直至庚戌十五年中自鄉會試主考總裁入闈而外
未嘗一日不侍講席逮

上御極每奏事必

召對奉使陛辭與怡公良同入

上問及歸期爲淚下府君亦泣嗚呼孰謂遽永訣耶十八
日遺疏入

九重震悼至哭失聲輟朝一日

殊批憶昔在書齋日承清誨銘切五中自前歲春凜承大
寶方冀贊襄帷幄讜論常聞詎料永無晤對之期十七
年情懷付與逝水嗚呼卿之不幸實朕之不幸也奉

上諭協辦大學士杜受田秉躬端正勵節直清經術淵醇
體用兼備蒙

皇考宣宗成皇帝特達之知由詞臣視學山西

特召還朝入直上書房爲朕講習討論十餘年中日承啟迪
獲益良多嗣經游歷正卿忠勤益懋朕親政後加太子

年譜
太傅銜以刑部尙書協辦大學士特命管理禮部事務
每召見時於用入行政國計民生造邾敷陳深資匡弼
前因豐工尙未堵合江南山東兩省窮黎急需賑卹宵
旰焦勞難安寢饋特派前往查辦疊據奏報東南賑務
均已布置周妥念其觸暑遄征心力交瘁正切睠懷而
前後奏摺中總未自陳病狀乃本日怡良等馳奏杜受
田竟以感受暑溼觸發肝氣舊症於本月初九日遽至
不起披覽遺章不覺聲淚俱下悲痛實深回憶書齋景

况如在目前奉使陛辭情尤眷戀方冀贊襄帷幄讜論
常聞詎料相睽兩月晤對無期耶著賞給陀羅經被由
驛發往加恩晉贈太師大學士入祀賢良祠照大學士
例賜卹任內一切處分悉予開復應得卹典該衙門察
例具奏並賞給廣儲司銀五千兩經理喪事靈柩回京
沿途地方官妥爲照料護送准其入城治喪屆時朕當
親臨奠醊用申悲悃伊父頭品頂帶前任禮部侍郎杜
墀年屆九旬猝聞此信定深悼痛著派恩華卽日前往

看視並賞給人錢十兩以資調養伊子杜翰著服闋後
加恩以庶子補用伊孫三人均著賞給舉人准其一體
會試以示朕愴懷舊學恩眷優加之至意欽此同日奉
上諭朕念杜受田之父杜堯年近九旬在京就養猝聞伊
子差次病逝自必傷感逾常伊孫杜翰現任湖北學政
惟伊次孫杜翻一人在京若前往清江奔喪則伊祖杜
堯前乏人侍養朕心實深厪念著傳旨令杜翰卽由
湖北馳赴清江浦扶柩回京所有學政關防暫交巡撫
兼署杜翻卽在京侍養毋庸前往以示體卹欽此二十
六日禮部以卹典具奏奉

上諭昨因協辦大學士杜受田於差次溘逝業經降旨加
恩茲據禮部查明應得卹典奏請予諡因思杜受田品
端學粹正色立朝

皇考宣宗成皇帝深加倚重

特簡爲朕師傅憶在書齋朝夕納誨凡所陳說悉本唐虞三
代聖賢相傳之旨實能發明蘊奧體用兼賅朕卽位後

周咨時政利弊民生疾苦亦能盡心獻替啟沃良多嘉慶年間大學士朱珪仰蒙

皇祖仁宗睿皇帝鑒其品節

特諡文正杜受田公忠正直媲美前賢揆諸諡法實足以當正字而無愧無庸內閣擬請著卽賜諡文正其餘一切卹典均著照禮部所請辦理用示朕眷懷舊學崇錫令名至意欽此八月十五日^翰由湖北星奔至浦九月初四日奉樞北行二十六日抵京次日奉

上諭原任協辦大學士贈太師大學士杜受田靈柩現已到京派恭親王奕訢帶領侍衛十員卽日前往奠醊朕於十月初四日親臨奠醊欽此屆日辰刻

聖駕親臨喪次坐奠三爵拊棺慘慟左右侍從罔不隕涕御前王再四籲請逾時始止以次

召見家祖及^{翰翻}庭琛並

垂詢庭珏庭璆當以年幼無識未敢接駕覆奏次日奉

上諭昨日親臨杜受田宅奠醑撫棺灑淚悲悼實深並見其門庭卑隘依然寒素家風追念遺徽益增感愴當召見伊父前任禮部侍郎杜堦令其兩孫杜翰杜翻扶掖起跪精神尙可支持惟年屆九旬遭茲慘痛何以爲情杜堦前已賞給頭品頂帶著再加恩賞給禮部尙書銜其勉自排遣加意頤養以慰朕念將來杜受田靈柩起程回籍時著派恭親王奕訢前往祖奠目送並著沿途地方官妥爲照料護送到籍用示朕篤念舊學有加無已至意欽此越日恭親王惇郡王親來設奠悲痛逾常惇邸手書輓詞云悲切九重寵錫殊恩聯四代緣慳一別常留遺範在三天以府君出都日王適居憂也十九日禮部尙書鎮國公奕湘奉

命諭祭讀祭文曰溯成勞於經幄舊學難忘緬碩望於綸扉嘉猷丕煥彤廷日贊正持節以邁征丹旆風淒遽騎箕而長往特隆奠醑式備哀榮爾晉贈太師大學士原任太子太傅協辦大學士杜受田學有本原行爲師表

年譜
秉躬端正勵節直清經術則漢博宋精文章則董醇賈
茂起家上第列職清班陟宮僚而品重蓬瀛膺學使而
教興唐魏以命世賢才之選被

先朝知遇之恩屢晉芳銜旋蒙

特召屬朕書齋稽古講席敷文典學無間於始終納誨深資
於朝夕洊躋鳳閣遂掌烏臺筦出納於農曹綜虞衡於
水部典春官則滿城桃李柄秋試則盈籠蔓荅凡茲寵
秩之疊加久荷

帝心之簡在肆予纘極圖任舊人晉位台衡總司部務每於
內廷倬直前席敷言心款款以效忠政優優而布績以
伊傅之躬自責用佐經綸非堯舜之道不陳無慚柱石
念

實錄昭垂來禩畀名儒總挈洪綱謹校勘之專司益恪恭而
將事蓋識小悉賅於識大所賴中朝輔弼之臣而見知
更益以聞知足窺

先帝功文之盛比以河渠告溢宵旰難安慎選上卿旬宣南

國體痼瘵於黼座飢溺爲懷載澍澤於軒車勤勞罔恤
詎意政成心瘁民樂身憂疾疢忽嬰淪沮遽告憶劬勤
之有素共仰風規悵晤對之無期難禁雪涕漼之經被
賻以儲鏐飭疆吏以護喪晉官階而宅揆三台領袖太
師酬啟沃之庸百世馨香秩祀永賢良之譽憫高年之
失養遣官而慰藉良殷念再世之詒謀錫類亦恩施不
匱禮特隆夫親奠典優賁乎飾終載設苾芬用光俎豆
於戲二千里靈輻迤返益觸悲懷十七年清誨常聞都
成往事人惟求舊竟虛聽履之聲天不憖遺孰奏和羹
之績惟靈不昧尙克歆承是日大學士壽陽祁春圃先
生來題主二十日恭奉靈柩暫安宣武門外之觀音
院十二月初十日奉主人賢良祠

諭祭文曰朕惟雲興泰嶽帝庭符霖雨之徵露湛乾階天
室協鈞衡之下矧緬師儒之啟沃造郟抒忱更懷節使
之勤勞鞠躬告瘁宜頒溫綍載闡徽猷爾晉贈太師大
學士原任太子太傅協辦大學士杜受田績學淵醇禔

躬端慤承顏鯉訓接武鰲峯冠文壇而蕊榜蜚英領史局而芝坊晉秩滇南秉節羅杞梓以掄材山右宣風擷藻芹而育士頭銜屢轉心跡雙清遂膺

皇考之知用作朕躬之傳書齋侍直非堯舜之道不陳講席論思以臯夔之責自任俄遷鳳閣旋掌雉工屬正宣猷稼部重貳卿之寄多冠執法柏臺嚴獨座之儀趨朝而驄馬承榮三霄切近曳履而鳴鳩統任六府交修衡文特主夫南宮總傅長依乎北闕凡此

先朝之寵眷悉由爾位之靖共朕昔自沖齡早資訓迪洎登大寶彌切咨諏用入行政之宜治國安民之要披陳所及宏益良多嘉乃忠勤渥加簡畀官銜允晉推恩並逮於椿庭邦典宜詳弼教乃遷之棘寺奏萃笙之什桂籍興賢培芸館之英蓬山示範銓部方資夫兼攝綸扉爰任以參知屬因

實錄昭垂端賴耆臣纂輯文呈乙覽三長綜書局之才望重寅清一意勘史官之籍旣以問民疾苦致勞爲國馳驅

年譜
拯荒而鴻野無罄觸暑而鱗隄暫駐方冀輶軒旋返忠
言長藉匡襄何圖疾疢沈綿遺疏忽聞殂謝朕纔兩月
訣竟千秋三千里素旒空歸劇悲旅次十七年絳帷如
昨莫覲師資悼念滋深哀榮宜備賁溫詔而恩延四世
晉台階而秩首三公經被遙頒馳傳則官爲護送帑金
渥賚入城而奠予親臨崇祀賢良易名文正爰稽彝憲
用答成勞於戲黷八座之星芒蒙養難忘夫舊學想九
齡之風度升香永薦以明禋庶克歆承昭茲休寵

三年癸丑二月奉

上諭原任協辦大學士贈太師大學士杜受田於道光十
六年蒙

皇考宣宗成皇帝簡用上書房師傅與朕朝夕講貫發明唐
虞三代心傳十餘年間敦誨不倦朕親承啟迪獲益良
多卽位後諮訪古今政治利弊暨民生疾苦無不盡心
匡弼獻納嘉謨倘能久在左右於時事艱虞尙冀多所
補救本日臨雍講學追思曩日討論之功宜沛恩施以

年譜
昭篤眷杜受田之父杜堦前賞加禮部尙書銜著再加
恩賞食全俸杜受田靈柩尙未歸里著派惇郡王奕誥
前往賜祭一次該衙門卽照例預備用示朕崇儒重道
至意欽此四月奉

上諭贈太師大學士原任協辦大學士杜受田靈柩回籍
前降旨派恭親王奕訢前往祖奠日送並著沿途地方
官妥爲照料護送茲聞初四日起程回籍著加恩於到
籍後賜祭一壇派散秩大臣承志前往祭奠以示朕篤

念師儒有加無已至意欽此十三日抵里二十七日

賜祭如儀穆卜十月初八日未時安葬於濱州城西北徐

家園新阡癸山丁向

御製碑文曰朕惟贊襄綸閣中朝資柱石之良啟沃經帷
舊學重楷模之望緬交修於疇昔鈞衡之倚畀方殷悵
遺範於老成鐘鼎之勲名丕煥睠懷曷已彝典宜崇爾
晉贈太師大學士原任太子太傅協辦大學士杜受田
績學精醇禔躬端粹世濟忠勤之美早躋清秘之班書

雲物以摛詞輒膺上選載星輅而奉使特昇文宗衡才
方詠夫皇華侍讀旋依乎禁樹惟有本有文之素裕荷
先皇特達之知斯以引以翼之攸資輔朕躬念典于學恪共
納誨敷歷升階迴翔雅稱頭銜記注並嫻掌故迨洊登
平奎閣仍專任於書齋遷水部而園法兼權副農曹而
經筵斯直烏臺總蒞憲執霜清雉正允諧功嚴日省庫
藏任綜網之重朝參邀緹轡之榮泊統資矜式於三天
久親大雅而克勵精勤於卅載疊被

殊恩永錫類以

推仁溯燕翼而衣榮一品懿教忠之篤慶荷

龍章而字炳千秋隆禮特膺盡忱益懋朕躬親庶政心眷師
儒晉太傅之官銜介耆齡以宸翰寅清倍勵申命有加
兼掌銓衡尤重明刑於司寇繼登揆席允資弼直於參
知儲才而芸館培英俾俊髦之咸式典試而棘闈考藝
正恩榜之初開揚

先烈以成書編摩維謹簡重臣而將事勘校專司遂移秋省

之繁勞特隸春官之秩敘蓋仕學之優並著信體用之
能賅非堯舜之道不陳矢靖共而罔懈凝命救幾之義
蘊務揭精心用入行政之機宜胥徵忠悃屬以黃流鯨
肆赤野鴻哀賑卹咸施馳驅特命撫窮黎以安輯嘉乃
勲勞念災景之歆蒸深予眷注何小別偶嬰舊疾乃長
辭遽報遺章奉一編而義闡經邦緬風規其如昨持雙
節而情殷戀闕曾日月之幾何披疏含悲輟朝增戚飾
歛遙將襚服助喪厚給帑金正端揆而表師資銜更隆

於保傅報馨香而光祀典名永著夫賢良厯厥考之傷
心留次孫以侍郟存問而專官用遣扶持而上藥優頌
爾子方荆楚持衡迎素紼而豫加宮秩乃孫正蘭階成
列繼青緇而並賜賢書望千里以歸來親臨奠輟布十
行而褒卹備極哀榮爰稽令典以易名克與前賢而媲
美諡之文正無俟詳推綜厥生平彌殷軫念於戲二三
臣台階匡弼最愴懷耆舊之云殂十七年講席親摩猶
想見儀型之未遠載申鳳綉式勒螭文來禩永貽休嘉

勿替

六年丙辰十一月奉

上諭本日

皇考宣宗成皇帝聖訓實錄告成朕祇肅受書實深欣慶湖
思開館以來所有監修總裁等皆能盡心編輯各矢勤
勞允宜特加優獎原任協辦大學士贈太師大學士杜
受田開館之初章程體例皆其手訂編纂稿本業經過
半茲全書告歲未與觀成殊深追念著加恩賜祭一壇

伊孫舉人杜庭琛著賞給貢士一體殿試欽此尋禮部

奏查照成案照

諭祭例遣官至該本家致祭或願在本籍墳塋致祭報部
分別辦理等因據奏呈明請咨山東巡撫遣員於本
籍墓前致祭

七年丁巳五月巡撫崇恩委候補知府張鼎輔致祭
諭祭文曰朕惟班崇論道常懷輔弼之功典懋酬庸特重
苾芬之祀緬遺型而瞻舊寵錫黃封稽成憲而推恩榮

宣紫綽爾原任協辦大學士贈太師大學士杜受田秉
心淵懿立品端醇一德誠孚倚畀久隆於

先帝三師望重欽崇更切於朕躬憶書齋晤對之年深資啟
沃泊寶座誕膺之日尤賴勛輔台德而說命親承揚
前烈而

堯文丕煥雖

典謨深遠本擬議之難名而望散趨墮或見知之有屬仰
貽謀於卅載敬闡

心源溯將事於六春綜歸手訂念盡勞之夙著幸茂典之慶

成言考彝章用陳芳薦於戲

瑤編載誦敢忘繼述之思玉醴遙頒尙冀馨香之達爾靈不

昧庶克欽承

九年己未正月奉

上諭贈大學士太傅禮部尙書銜原任禮部侍郎杜堉靈
樞同籍前經降旨派貝子綿勳前往祖奠目送並著沿
途地方官妥爲照料護送茲聞本月二十一起程著

加恩於到籍後賜祭一壇並於贈太師大學士杜受田墓前賜祭均著山東巡撫崇恩派委道府大員前往奠醑以示朕篤念師儒有加無已至意欽此二月巡撫崇恩委候補知府博文致祭

諭祭文曰朕惟贊襄綸閣睠懷耆舊之勲啟沃經帷雅重典型之望既推恩而加禮榮逮所生宜展祀以升香眷隆靡已載陳雕俎式煥龍章爾原任協辦大學士贈太師大學士杜受田淵懿秉心端醇植品家夙承夫詩禮

世克濟其忠勤荷

先皇特達之知卅載聿隆倚畀輔朕躬念典于學三天尤切欽崇記疇昔之交修深資納誨賴匡扶於踐阼允協參知洎乎碩範云亡垂暮益廛厥考既乃老成遽謝隆儀爰飾其終值素紼之將行言開祖席更丹綸之遙賚特肆靈筵惟計程千里以遄歸而銜恤九泉其笑慰倍殷愴念遺徽遠溯夫師資合沛殊施優禮用光夫秩祀咨重臣而將事考彝憲以頒恩於戲憶

謨訓之成書嘉薦懋酬庸之典達馨香而告潔幽阡妥將父
之忱爾靈有知庶其歆格

右 先公年譜^翰等識淺學荒於 先公居家立朝
大端不能仰窺萬一重以苦塊餘生昏瞶迷亂語更
無次伏念 先公備荷

兩朝殊遇生平文行例得上列國史下亦允孚士論本不待
於敘述又况 先公自直書房歲時常寓淀園直廬
^{翰翻}各有官守趨公之暇侍奉 重闈未能常侍左

右偶以退直歸省而 先公語不及公有奏牘率皆
焚草更何敢以緣飾無據之詞誣吾親欺天下後世
惟是

朝廷恩禮非常稠疊與夫庭幃見聞所及亦當以備家乘
傳後嗣用是忍哀濡筆謹就年月追憶編次成茲年
譜語皆贅亂挂漏必多伏望 先公執友與當代大
人先生進而教之則 ^{不孝翰翻}世世子孫感且不朽

^{降服子翰}泣血謹述
^{孤子翻}

賜進士出身

誥授光祿大夫 經筵講官 文淵閣領閣事稽察欽奉

上諭事件處 國史館總裁 紫禁城騎馬 武

英殿大學士總理工部事務管理戶部三庫事務

上書房總師傅軍功加四級年愚姪長洲彭蘊章頓

首拜填諱



自其遠遊	上書房地師傳軍功加四載年滿長洲彭頭登	受命大學生總理正刑奉命為總理戶部三庫掌	上諭專人職一國史館掌書林全錄地醫	大德一夫 郵部議官
------	--------------------	---------------------	------------------	-----------

